

Խմենք, եղբայրներ, այն մարդու կենացը, որ մտցրուց մեր մեջ այդ ոգին, խմենք այն գործի յաջողութեան համար, որը մեր սուրբ ուխտն է:

Բաժակները զարկոտեցան մէկ մէկու եւ խմեցին որսորդ Աւօյի կենացը, բոլորը միաձայն գոչելով՝ «կեցցե՛ բարի գործը»...

ԺԹ. ԵՐԱԶ

Դարձեալ նոյն հին երգը, մտածում էի ես Կարօյի ճառը լսելու միջոցին – նոյն երգը, որ նա երագում էր տասն եւ երկու տարի առաջ գիւղացիների եւ նրանց աղքատութեան մասին:

Կարօյի եւ նրա կուսակիցների նպատակը թւում էր ինձ ոչ միայն անգործադրելի. այլ որպէս ցնորք, որպէս հիւանդոտ երեւակայութեան զառանցութիւն: Միթէ կարելի՞ է գիւղացուն հանգստութիւն տալ, ազատել նրան աղայի ճանկերից, որի մեջ կայ այնքան ուժ, որը վայելում է այնքան արտօնութիւններ: Եւ ինչո՞վ, որպէ՞ս ապահովել մշակի ապրուստը, երբ ոչ մի օրէնք չէր սահմանափակում աղայի կամայականութիւնը. երբ կառավարութեան ֆիրմաներն եւս մնում էին անգօր եւ չէին կարողանում աղաների բռնութեան առաջն առնել: Ես գիտէի հարիւրաւոր օրինակներ, որ ժողովրդի բարօրութեան մասին շնորհած արքունի ֆիրմաները մնում էին անգործադրելի. խաները եւ բեկերը Բարձրագոյն Դռան հրովարտակը ստիպեցնում էին բերողին ծամել եւ կուլ տալ, կամ պատռելով եւ ծեծելով բերողին, այնպէս ճանապարհ էին դնում նրան, ասելով՝ «գնա՛յ, թագաւորիդ խաբար տա՛ր»: Եւ այսպիսի գազանները, որոնք ժողովրդի արիւնն էին ծծում, առանց խոնարհուելու որեւիցէ իշխանութեան, մնում էին միշտ անպատիժ:

Այժմ Կարօն, ոգեւորած մի մոլի եռանդով, իւր անձնագոհ ընկերների հետ, աշխատում էին յեղափոխել հին դրութիւնը, աշխատում էին փշրել ստրկութեան շղթաները, որոնք դարբնուել էին այնքան շատ դարերով: Եւ ինչո՞վ, որպէ՞ս...

Ինքը Կարօն խիստ ճիշտ նկատեց իր ճառի մեջ՝ թէ «ստրկութիւնը դարձել է ժողովրդի մեջ բնաւորութիւն»: Միթէ՞ հեշտ է փոխել բնաւորութիւնը, դարերով ամբոխի հոգու մեջ արմատացած բնաւորութիւնը: Ի՞նչ օգուտ, երբ մի քանի եռանդոտ անձինք զարթել էին, հասկանում էին ժողովրդի չարն ու բարին, եւ աշխատում էին դարման տանել նրա խղճութիւններին, – երբ այդ մի քանի անձանց բոլոր ջանքերը կորչելու, ոչնչացնելու էր ընդհանուր անտարբերութեան մեջ: Նրանց բարբառը լինելու էր անապատում հնչող ձայն, եւ նրանց գործակցութիւնը, որպէս մի համերաշխութիւն գերեզ-